

Bainvgnüda a Madlaina Gremlich sco caluostra da la baselgia da Ftan!

Als 1 november surpiglia Madlaina Gremlich da Sent sia piazza a Ftan. A la nouva caluostra giavüschaina tuot bun e bler plaschair per quist servezzan.

A Cilgia Florineth, la caluostra actuala, ingrazchaina da cour per seis grond ingaschamaint e sia chüra da la baselgia, seis contuorns e tuot sia lavur preziosa pella vita da nossa raspada sco caluostra e sco consistoriala. Grazcha fich eir a Susanne Kientzler per sia lavur e seis agüd pella caluostra.

Madlaina ha respus in üna cuorta intervista trais dumondas per as preschantar a la raspada.

Madlaina, pudessast far il bain da'T preschentar?

Meis nom es Madlaina Gremlich ed eu n'ha 36 ons e stun a Sent.

Tras mia fascinaziun per ils gods da muntogna e mia lavur principala sco indschegnera forestala suna rivada in Engiadina Bassa, ingio ch'eu am saint a chasa. Eu passaint jent temp cun meis chars e giod il temp illa natüra e fetsch suvent musica e chant.

Che es Tia motivaziun per surtour la piazza sco caluostra a Ftan ?

Grazia ch'eu chant aint il cor masdà Ftan suna pro differentas predgias gnü in contact cun vossa raspada e n'ha imprais a cugnuoscher a Vus.

Eu stim il contact cun differenta glieud, fetsch jent lavur manual ed am vögl ingaschar cun meis servezzan per la cumünanza da nossa raspada.

Che giavüschast per quist servezzan e pella baselgia?

Eu giavüsch da güdar cun mia lavur, cha la raspada poss eir in futur giodair in contuorns adattats e cordials las predgias ed otras occurenzas da cumünanza. Pella baselgia am giavüscha cha ella resta inavant ün lö prezios per la chüra da la cretta ed eir per cordials contacts tanter ils conumans.

Implü sperescha cha nus stimain e chürain las tradiziuns da nossa baselgia ed eschan tantüna averts per ils bögns ed il svilup da nos minchadi dad hoz.

Grazcha pellas respostas e tuot bun per Teis servezzan pella baselgia da Ftan!

Per sustegner a Madlaina tscherchaina amo 1 fin 2 persunas chi pudessan güdar pro singulas occurenzas. Per ulteriuras infuormaziuns ed annunzchas stan la ravarenda e la secretaria jent a disposiziun.